

1 TIMOTHY

Lat Inan Paul.angan Ump Timothy Alantan

¹ Ayyang, nhengk ngatharam Timoth.ang, ngay in Paul.ang lat inan umpang nungkar. Ngayang God.ang wik thampang kuchpul Jesus Christ.ang. Nil puth God.angan kanam kaa'-piichanath ngampang, puth nil Christ Jesus.angan ngul kalow ngampang aak-aakanak kenyan God.antangan wun-wunāmpa. ² Nintiy Timothya ke' nhengk ngatharam yimanangana, ngayan puth Jesus Christ.antam wik waa'-waa'ang nungkar, nint ngulan ngangk thee'an nungantweya. Ngay kaangk pul piip God.angan a' Lord Jesus Christ.angan ngangk minangam iiy-iiyowpul nungkar, ma'-aath-aathowpul nintang, a' puth ngangk min yumpowpul nintang.

Pam Wiy Aak Nanman Wun-Wuntanan-a, Wik Wayanang Thaa'-Aath-Aathantan Thanang

³⁻⁴ Ngay inan thawang nungka, Timothya: nint aak Ephesus nangman wun-wunān. Ngay nungka'athangam wampangan-a, ngay wik thaa'-thayanam thaw-thawang nungkar nint aak Ephesus nangman wun-wunāna, a' ngay kan-ngul iyyangan aak Macedonia.akan. Ngay inan putham ngul thawāng nungkara. Than pam pu-ungki wiyiy aak nangman wun-wuntanan-a, wik way-way thaa'-aath-aathantan thananga, wik God.antaman ke'am waa'-waa'antan thant, ya'a. Than ngaantam-ngeey-ngeeyantan wik kath pam wiyantam anangan keenkanaman waa'-waa'ina, wik than yaanan thanaman wik ngunchina. Nint wak-wakān thanang, a' thaw-thawān thant wik wayanang thanttaman wantayna. Thon

inan thawān thanta: lat onγκ wuut mangk thanntaman namp wun-wuntan-a, yaam ke' ngaantam-ngeey-ngeeyayn a! Than puth aak-ya'ang thaw-thawantan, aak-ya'ang mep-mepwuntan thanntakam, a' puth ke'am ma'-aath-aathantan thanang pam wanch Christians anangan yipam Jesus.an ngangkangan pi'-pi'ayn nunang.⁵ Ngay puth thawang nungκ wik thaa'-thayanam thaw-thawān thant, than yipam wayan wantayn, a' minam iyy-iiyayn mee' God.antangan, a' way anangan kuchekangan ke' ngaantam-ngeey-ngeeyayn, a' than kan-kanam paththam ngaantam-ngeey-ngeeyayn wik God.antamana! Than nanpalaan ngangκ minangam ngul iyy-iiyayn thanntakamana. ⁶ Puth than pam wanch wiy anangan minam ke'am iyy-iiyantana, ya'a, than way ngul ween-weentan, woyan God.antaman ke'-ngul wak-wakantan, than ma'-yotaman puth wik aak-ya'ang mep-mepwuntan thanntakaman. ⁷ Than pam wanch inangan kaangk wik thayan God.antaman waa'-waa'ayn, ke' than pam pi'-pi'anam yimanangan ngaantam-ngeey-ngeeywuntan thanntakaman, puth ya'a, thanan ngoongκ-ngoongkaman thaw-thawantan a!

⁸ In ngeeyiy a! Ngamp ngaantam-ngeey-ngeeyanamp wik thayan God.antamana an min paththama! Ngamp puth wik nungantam minaman thaa'-aath-aathimp thanang wiy ananganwey-a, an min thanta. ⁹ Ngamp kan ngeey-ngeeyamp nil God.angan wik thayan nungantaman want, pam wanch min al-alantakaman ya'a, puth pam wanch way al-alantan thampang, than yipam ngaantam-ngeey-ngeeyayn thanntakaman than wayan yump-yumpantan. Than puth wiyanganiy-a, wik thayan pam pi'-pi'anantama pip-pipantan, kulliy iyy-iiyantana; wiy anangana kaangk ke' God.an wik ngeey-ngeeyayn nunang. Wiy al-alangan ke' ngaantam-ngeey-

ngeeyantan God.an nil pi'anana, ya'a, than way anman ke'-ngoongkam yump-yumpantan. Wiy anangana ke'am kaangk wun-wuntan nungant God.antana, than way waa'-waa'antan nunang. Wiyangan-a, mul-mulathantan thanang pam wanch wiy anangan; wiyangiy-a, kaath piip thanttam mul-mulathantan. ¹⁰ Wiy anangan-a, maarich kee'-kee'antan; wiyiy-a, pul-pamam maarich kee'-kee'anpul. Wiyanganiy-a, than pam wanch puk wiy anangan mam-mamantan thanang a' kalantan thanang ngulwey aak thonaka work yipam iiy-iiyayn thantana. Wiy anangan-a, wik uuy-uuyamantan; a' wiyanganiy-a, wik thayan God.antaman pip-pipantan. Nil God.angan wik thayan anangan want pam wanchantana thanana way inangan yump-yumpantan, than yipam ngaantam-ngeey-ngeeyayn thanttakaman thanan way yump-yumpantan. ¹¹ Puth wik inanganiy-a, kuchek ngatharam inpalan ya'a, nil God.an thawar ngay waa'-waa'āng niyantana, wik inangana min-minam paththam God.antam. Niliy-a, piip God inana pi'an, a' puth-a, min-minam paththam.

Ngay Thankyou Thawang Nungant Christ.antan Nil Puth Ngangk Minangam Paththam Iiy-Iiyan Ngathara

¹² Ngay thankyou thawang nungant, Christ Jesus.antan, pam moom pi'an ngamparam alantana, nil puth ngangk thay-thayanathan ngayang, ngay yipam work nungantan iiy-iiyāng. Nil puth ngayang ke'am ma'-pithanya, ya'a, nil kan-kanam ngaantam-ngeey-ngeey ngayang ngay work nungantan iiy-iiyāng, ke'-paal nil work inan thee'ar ngay wik God.antaman waa'-waa'āng niyantana. ¹³ Ngay ka'athaman-a, wik wayanang kuyam waa'-waa'angan nunang Jesus.ana, nench-nenchangan thaka,

a' pam wanch nungantam al-alantan way thak yump-yumpangan thant, puth thaamp-thaampangan thanang. Nungkway ngay pam way-wayaman iyy-iiyangan-a, nil Christ.angan-a, ngangk mamanya, puth ngaywey ka'athaman ngoongk-ngoongkam ngayan pam way iyy-iiyangan, ngay puth ke'aman yippak ngaantam-ngeey-ngeeyangan nunanganiya nil nhengk God.antaman. ¹⁴ Puth moom ngamparaman-a, Christ.an-a, ngangk min-minam paththam iyy-iiyan ngatha, a' nil ma'-aath-aath ngayang kan-kanam ngaantam-ngeey-ngeeyāng nunang nilan nhengk God.antaman, a' nil ma'-aath-aath ngayang ngangk minangam iyy-iiyāng nungant, puth pam wanch wiy al-alantan thampa.

¹⁵ Yaa, wik thon inan ngeeyāna! Nil Christ Jesus.an-a, pal kenyuw uk aak iikanakan ngampar nil yipam aak umyompanaman way anpalana kaa'-piichanathow ngampang. Wik inangan-a, kan-kanama, ngamp kuchekangam pi'-pi'āmpa! Kan-kanam ngaantam-ngeey-ngeeyāmpa! Ngay puth ka'athangaman pam way-wayam paththam iyy-iiyangan, ¹⁶ nil puth God.angan-a, ngangk mamany. Nungkway ngay pam way-wayam iyy-iiyangan-a, nil Christ Jesus.an-a, ngangk kul erkam ke' wampant, nil yippak kuup-kuup ngathar, woyan thath-thathar, a' anpalana ngayan kan-kanam ngaantam-ngeey-ngeeyang nunang ngula nilan nhengk God.antaman. Nilaniy putha kuup-kuup ngathar yimanangkana, yipam pam wanch wiyangan thathayna, ngaantam-ngeey-ngeeyayn ngula nil God.an kuup-kuupan thant, than yipam kan-kanam ngaantam-ngeey-ngeeyayn nunang Christ.an nil nhengk God.antamana, a' aak piip God.antang ngulakaman wun-wunayn.

¹⁷ Ngamp God.an ngaantam-ngeey-ngeeyāmpana! Nil puth ma'mangkamana ma' nilam pi'-pi'an; nil moom

pi'an paththam wun-wunan, nathpalmana, in-inmana, puth ngulakam wun-wunow a! Nil ke' uthamiy, ya'a, nil aak umpuyam yaamakam wun-wunow. Ngamp ke' thathimpana, mee' ngamparam il-ilangan ya'a, nil aak ya' yimanangan iyy-iiyana. Nil God thonam anman a! Thon ya'a! Ngamp yotangam thaa'-kuump-kuumpāmp nunang, inpalman-a, ngulakam a! Yey, kan-kanama!

¹⁸ Timothy-ang! nhengk ngatharam-ang! Ka'athaman-a, pam wanchan thawin nungkar nil God.angan nintang mi' work nungantam inan iyy-iiyāna — yaa, ngay puth inan thaw-thawāng nungka, wik inangan-a, ngaantam-ngeey-ngeeyāna, kuchekangam pi'-pi'ān thanang, ngangk thayanam yipmam work iyy-iiyān nungant God.antan, a' oony wayan-a, um thaamp-thaampān nunanga. Ke' soldiers al-alangan um thaamp-thaampantan thanang pam anangan kul thanan pek-pek-wuntanan-a, nint yimanangan um thaamp-thaampān nunang oony way anana. ¹⁹ Nint Christ.an ngangkangam pi'-pi'ān nunang, a' min anman yump-yumpāna mee' nungantang God.antangan. Puth pam wanch wiyangan woyan God.antamana kanam wantin, than ke'-ngul wik nungantaman ngeey-ngeeyantan, an ya' ngula. ²⁰ Pam kucham inangan pul Hymenaeus a' Alexander.angan-a, pulan yimananga woyan God.antaman kanam wantpul, woyan way ngul wak-wakanpul. Ngay ma'am kanam thee'angan pulang oony way alantan, ma' nungantang ngul iyy-iiyowpula, pul yipam thiichowpul pulantakaman pulan wayan yump-yumpanpul, a' yipam ke'-ngul wayan waa'-waa'owpul nunang, God.an, ya'a.

2

Niiy Yal-Yalmathwuniy Aak Churchangan-a, Niiy Wiyantan Mee'-Wuth-Wuthanamān Thaka

¹ Ngay wik min ngul waa'āng nungkar, nint wik inangana ngeey-ngeeyāna! Ngamp mee'-wuth-wuthanamāmp God.ant, pam wanch yotamantweya, a' ngampaniy-a, thankyou thamp thaw-thawāmp nungant God.antan. ² Ngamp thamp mee'-wuth-wuthanamāmp thant, pam pi'-pi'anam al-alantan, puth pam pi'-pi'anam kings al-alantan thamp, ngamp yipam aak minang wun-wunāmpwey, kul ke'anang, ngamp yipam min-minam paththam iyy-iiyāmp ngamparakamana, mee' God.antangana. ³ Ngamp mēe'-wuth-wuthanamāmpa pam wanch yotamantan-a, an min ngampara, puth God.antana ngangk min ngul wun-wunow nungant. Niliy puth-a, nhengk nungantaman kuch nunang kaa'-piichanathow ngampang way ngamparam anpalana. ⁴ Nil puth kaangk pam wanch aak umyompanamana kaa'-piichanathow thanang way thanntam anpalan; a' nil kaangk thanan wik nungantaman wik kankanam ngaantam-ngeey-ngeeyayna. ⁵ Nil puth God thonam anmana! Wiy ya'a! Puth ngamp yotaman pam wanch waank ngul iyy-iiyanamp nungantama piip God.antamana, ngamp puth way anman yump-yumpanamp, nanpalman. Nil puth pam thonam anman thaa'-pant thaw-thawan ngamparaman, Jesus Christ.an, ngamp thintham yipam iyy-iiyāmp nungant God.antan. ⁶ Nil puth Jesus.angan theetath nungamang uthamow ngampar, pam wanch yotamantan, nil God.angan yipam way anpalana kaa'-piichanathow ngampang. Aakan kan wamp nungantan uthamowan-a, nilan mi'an God.angan-a, nil Christ an-aniyangan utham, nil yipam meenathow ngampar nil God.angan kaangk kaa'-piichanathow ngampang, pam wanch aak nath-nathan wun-wunanamp. ⁷ Inan ke'-paala nil God.angan ngayang kuch ngay yipam iyyānga pam wanch Jews ya' al-alantan.

Ngay inan kan-kanam waa'-waa'ang niiyantana, ngay ke' wik uuy-uuyaminga, ya'a, nil God.angan kan-kanam kuch ngayang thantana, ngay yipam wik inangan God.antaman kan-kanam waa'-waa'ang thant, niiy yipam Christ.antan ngangk thee'āna.

⁸ Ngay puth wik inangan ngul waa'ang nungkar: than pam wanch want-wanttinan yalmathwuntanan-a, aak churchangan-a, ngay kaangk than pam anangan mee'-wuth-wuthanamayna, puth thanana pam min ngul iyy-iiyayna, God.an monkan-wak-wakayn nunang, ngangk kul ke' pi'-pi'ayn wiyantan, a' kulak ke' yipam wenk-wenkayn thanta. ⁹ Ngay inan waa'ang nungk thampa: ngay kaangk ke' than wanch Christians anangan ulp-ulpanangan iyy-iiyayn, than menth-menthaman ke' yump-yumpwayn thanttakamana. Than yangan thakan ke' min-minam yump-yumpwayn thanttakaman, yuk way min min-miniyān ke' kal-kalayn, kulich thakan wukal pi'anang ke' piy-piyayn, ya'a! Than puth kuchek minang iyy-iiyayna! ¹⁰ Than wanch anangan Christians.an waa'-waa'wuntanan-a, than al-alangan ke' ngaantam-ngeeywiythan ke' menth-menthaman iyy-iiyayna, an ya'a, puth thanan pam wanch wiyantan minam anman iyy-iiyayna.

¹¹ Than aak churchangan-a, wanch anangana appap nyiin-nyiinayn, wik God.antaman ngeey-ngeeyayn. Than ke' ngaantam-ngeey-ngeeyayn thanttakam than ke' moom pi'an yimanangan, an ya'a, than wik ngeey-ngeeyayn thanang pam wuut manth-thayan anangan. ¹² A' than wanch al-alangana ke' wik thaa'-aath-aathayn thanang pam anangan, a' putha moom pi'an ke' iyy-iiyayn pamantana, an ya'a. An min ya'a, ngay nanangan kaangk ke'a! Than wanch anangan-a, appap nyiin-nyiinayn aak churchangan, ¹³ puth nil God.angan ka'athaman-a,

pam Adam.an yumpan, amanamaniy-a, nil wanch ngul yumpan, Eve anan. ¹⁴ Nil puth oony way alangan-a, pam Adam.an ke' muukamathan, ya'a, nil wanch Eve anan ep-paththam muukamath nunangweya, nanpalan-a, nil wanch alangan wik God.antam pip-pip. Ngay puth namanaman wik inaniy thaw-thawang wanch al-alantan. ¹⁵ Than wanch al-alangan nath God.an ngangkangaman pi'-pi'iythan nunangan-a, than pukan kalaynan-a, pi'-pi'ayn thanang thakan-a, nil God.angan ngul kaa'-piichanathow thanang. Puth than wanch anangana pam wanch wiy al-alantan ngangk minangam iyy-iiyayn, a' minam iyy-iiyayn thamp mee' God.antangan, a' putha than kuchek minang anman iyy-iiyayn.

3

Than Wee'-Wee'anangan Pam Manth-Thayan Churchakan Iiy-Iiyantan-a, An Than Minam Iiy-Iiyayn

¹ Ngay wik inan kan-kanam waa'-waa'ang nungk. Nint kan ngeeyāna, puth inan wik min a! Nil wee'-nathwey kaangk pam manth-thayanan iyy-iiyow churchakan-a, an nil work minan ngaantam-ngeey-ngeeyan iyy-iiyowana. ² Nil manth-thayan churchakana yimanangan iyy-iiyowa: nil pam min iyy-iiyow, a' nil pam koy' thamp iyy-iiyow God.antan; a' nil wanch thonam anman pi'-pi'ow, nil wanch kuchamana ke' pi'ow, ya'a; a' nil minam anman ngaantam-ngeey-ngeeyow, kuchek wayan ke' wunwunowant, ya'a. Nil ngangk minangam iyy-iiyow thant pam wanch wiyantan; a' nil wik God.antaman minam thaa'-aath-aathow thanang; a' puth pam wanch aak nathpalanwey wampaynan-a, nil kalow thanang aawuch nungantamaka. ³ Nil ngak way mungkanan-a, ke' iyy-iiyow; a' nil kulakan ke' wenk-wenkow; puth pam maal iyy-iiyow, kul-thinthamak iyy-iiyow, kul ke' uwow thant wiyantan,

a' putha wukal-weenthana ke' iyy-iiyow thampa. ⁴ Nil wanch thum nungantam-a, a' puk nungantam anangan minam pi'-pi'ow thanang, nil minam iyy-iiyow thant yipam than wik ngeey-ngeeyayn nunang, a' ngaantam-ngeeyayn nunang nil pam mina. ⁵ Nilwey kampan nungantaman minam ke'an pi'-pi'iy thanangwey-a, nil puth pam wanch churchangan want-wanttak minaman pi'-pi'iy thanang a? An ya'a! ⁶ Nil pam Christian nyiingk-nyiiinkan iyy-a, niiy ke' yippak mi'an nunang pam manth-thayan churchakan iyy-iiyowa, ya'a. Nil puth ulp-ulpanang nath iyy-iiyiya, nath pam pi'an ngaantam-ngeey-ngeeyiy nungantakamana, a' nil puth God.angan pam way ngul waa'iy nunangana ke' nil oony wayan ka'athaman pam way waa' nunang. ⁷ Inan putha, nil minam anman iyy-iiyow, pam manth-thayanana, yipam pam wanch wiyangan-a, Christians ya' al-alangana thath-thathayn nunang, a' ngaantam-ngeey-ngeeyayn nunang nil pam min. Nil nath oony way pi'anan ngeey-ngeeyiy nunangwey-a, an nil pam min ke' iyy-iiyiya, nil nath man-mangkam thee'iy God.antan, amanaman-a, thanan nath waa'-waa'iythan nunang, ngul-nyaa' yump-yumpiythan nunang.

Than Wee'-Wee'anangan Ma'-Aath-Aathantan Niiyang Churchangan-a, Than Thampana Minam Iiy-Iiyayna

⁸ Ngay kan pam wiy anangan waa'ang nungka, thanan ma'-aath-aathantan niiyang churchangan, deaconsan waa'-waa'antan thanang. Nil wee'-nath कांगk deaconan iyy-iiyow-a, nil pam koy' iyy-iiyow, a' nil pam min anman iyy-iiyowa, a' nil ngak way mungkanan ke' iyy-iiyow, a' wukal-weenthana ke' iyy-iiyow thamp. ⁹ Niliy-a, kan-kanam ngaantam-ngeey-ngeeyow wik God.antum anangan nilan want ngampar, nil pal-puy

ke' ngaantam-ngeey-ngeeyow, ke' muukamow thakan, puth woyan God.antam anman wak-wakow. ¹⁰ Than pam wee'-wee'anangan kaangk ma'-aath-aathayn niiyang churchangan-a, nint thath-thathān thanang, nathwey minam iyy-iiyantana, nath ya' yaaka'a! Thanwey nath minam iyy-iiyiythan-a, a' kan-kanam paththam God.an ngangkangam pi'-pi'iythan nunanganiy-a, yaa.wey, niiy thawān thant than ep ma'-aath-aathayn niiyang churchangana.

¹¹ Wanch thum thanttam anangan thampa, than thamp minam anman iyy-iiyayn; wikana ke' kal-kalayna, waa'-waa'ayn thant, pal-puyana; ngak way mungkanan ke' iyy-iiyayn, puth kuchek waap minangam iyy-iiyayn, a' ma'-thayan iyy-iiyayn. ¹² Pam nil deacon alangan-a, wanch thonam anman pi'-pi'ow, kuchamana ya'a; a' nil minam pi'-pi'ow thanang, wanch thum nungantamana a' puk manyiy nungantam thamp. ¹³ Pam deacon anan work minaman iyy-iiyiy God.antan-a, wiyangan thathayn nunang pam nil minam iyy-iiyan; a' puth nilaniy-a, wikan minaniy ngangk thayanam waa'-waa'iy thant wiyantana, Jesus Christ.antamana.

Wik God.antaman Engkanang Ngul Wun Ngampar, Nil Puth God.angan Jesus.an Kuch Nunang Aak Iikanakan

¹⁴⁻¹⁵ Timothy-ang, ngay kaangk thathāng nintang, ngay puy yipam erkam wampāng nungkara. Ngay ke' nath erkaman wampingan-a, nath aak ingman yaaman wun-wuningan-a, ngay puth lat inan umpang nungkara, ngay yipam waa'āng nungka niiya pam wanch Christians anangana want-wanttakan minam iyy-iiyān, mee' God.antangan puth-a, pam wanch wiyantangana. Niiy ke' aawuch nungantam yimanangan nil God.an wun-wunan niiyantangana, nil puth God anan-a, man-yetham anman

wun-wunan, nathpalman, in-inman, ngulakaman wun-wunow. Ngamp pam wanch nungantam al-alangana wik nungantam anman ngangkangam pi'-pi'anamp, a' puth-a, waa'-waa'anamp pam wanch wiyantan. ¹⁶ Puth wik God.antamana ngamp ngaantam-ngeey-ngeeyanamp an wik min paththam a! Nil puth waa' ngampar ngamp want-wanttakan minaman iyy-iiyāmp mee' nungantangana. Nil ka'athaman-a, wuut mangk ngamparamantana manyam thaa'-thanpanam waa' thant, puth nil nyiingk-nyiingk ngulana an ep-paththam wik yot ngul waa'-waa'ana, engkanang ngul wun-wunan ngampar, nil nhengk nungantam Jesus.an meenath ngampar, nilan aak iikanakan ke' ngurp ngampam yimanangan uk; inan putha, nil Ngeen-Wiy Min God.antam alangan mee' yotantang meenath ngampar nil Jesus.an nhengk God.antama, a' puth ngaantiyongk God.antam al-alangan thathin nunang; puth inan thampa, nil God.angan kan koyam matath nunang, aak iikanak kenyan. A' pam wanchangana kan waa'-waa'in nunang pam wanch wiyantana, aak umyompanamakan, thaa'nganth thonthonantan. Aak nath-nathan wun-wuntan-a, pam wanch wiy al-alangan kan-kanam ngaantam-ngeey-ngeeyantan nunang nil nhengk God.antaman.

4

Pam Wanch Wiyangana Wik Ngul Ngeey-Ngeeyayn Oony Way Wiy Anangana

¹ Nil Ngeen-Wiy Min God.antamangan wik engkanang waa' aak ngul-ngulana than pam wanch wiyangan ke'-ngul ngaantam-ngeey-ngeeyayna wik God.antaman, thanan puth oony way anangan wik ngul ngeey-ngeeyayn, a' thanang ngul monkan-wak-wakayna. ² A' amanamany-a, than pam al-alangan wik way inangan

ngul thaa'-aath-aathayn thanang, a' wik ngul uuy-uuyamayn thakan. Than wik uuyamaynan-a, ngangk wayan ke' wuniy thant, ya'a, than ke'-ngul ngaantam-ngeeyiythan thanttakamana than wayan iyy-iiyantana, an ya'a. ³ Than wik way ngul thaa'-aath-aathayn thanang, yimanangan thawayn thant, “Niiy ke' ngentwuna, an way niiyanta! A' putha may wiy anangan niiyant ngencha! Ke' mungkāna!” Puth ngampaniya, Christians il-ilangana, wik God.antam kan-kanam ngaantam-ngeey-ngeeyanamp, nil puth God.angan may yotam yump ngampar, ngamp yipam mungk-mungkāmp a! Ngamp mayan mungkāmpan-a, ngampaniya thankyou thaw-thawāmp nungant God.antan. ⁴ Way min ma'mangkam nilan yump-yump-a, an min ngampar. Ngamp way ke' waa'āmpa, puth ke' thee'āmpa! Ngamp puth thankyou thaw-thawāmpanta, a' ngangk minangam mungk-mungkāmp. ⁵ Puth nil piip God.an thaw may minh yotaman an min ngampar mungkanakan. Ngamp thankyou God.antan thaw-thawanampan-a, an ngamp ngaantam-ngeey-ngeeyanamp nunang puth nilan may thakan yump ngampar.

Nint Minam Ma'-Aath-Aathān Thanang Christians Wiy Anangan

⁶ Timothy-ang, nint wik inangana waa'-waa'ān thantana pam wanch Christians al-alantana, nint yipam minam ma'-aath-aathān thanang, puth nil Jesus.angan work inan ma' nungkarang thee'a. Nint lat God.antaman thath-thathān, a' ngaantam-ngeey-ngeeyān, alangana yipam ngangk thay-thayanathow nintang woyan God.antaman wak-wakān. Wik nungantamana kan-kanam ngangkangam pi'-pi'āna a' wik ngeey-ngeeyān nunang. ⁷ Pam wanch wiy al-alangana wik kath way

thamp waa'-waa'antan. Nint wik kath way anangana al-alantaman ke' ngeey-ngeeyāna, a' ke' waa'-waa'an thaka, an puth wik min ya'a. Puth nintaniy-a, woyan God.antam anman wak-wakāna, nint yipam minam iyy-iiyān mee' God.antangana. ⁸ Ngamp miyal-miyalathwimpan-a, kemp minam yipam iyy-iiyāmp-a, an min ngampar. Puth God.an wik ngeey-ngeeyimp nunangan-a, a' puth woyan nungantaman wak-wakimpwey-a, inan min paththam ngampara, aak ingam wun-wunanak thonakaman ya'a, an ngulakam minaniy wun-wunow ngampar. ⁹ Wik inangan kan-kanam paththam a! A' puth kan-kanam ngaantam-ngeey-ngeeyāmp a! Ngangkangam pi'-pi'āmp a! ¹⁰ Ngampana wik God.antam inangan ngangkangam pi'-pi'anamp, ngamp ke'-paal work puy-puyam iyy-iiyanampa, ke' ngangkang thee'anampa, ya'a, ngamp ngaantam-ngeey-ngeeyanamp nil God.angan ngul minam pi'-pi'ow ngampang. Puth nilam God anman thonakama man-yetham anman wun-wunan, puth inan thampa, nilam thonamang ep-paththam kaa'-piichanathiy ngampang way yot anpalan ngampan yump-yumpampa. Than puth wee'-wee'anangan wik nungantaman ngangkangan pi'-pi'antan-a, nil anangan paththam kaa'-piichanathow thanang way thanttam anpalan. ¹¹ Nint puth wik inangana waa'-waa'an pam wanch wiy al-alantan, a' thaw-thawān thant wik ngeey-ngeeyayn.

¹² Nintana pam komp yippak iyy-iiyangan, wiy than nath thaa'-thengk-thengkathiythan nintanga, wik nungkaraman ke' ngeey-ngeeyiythan. Nint thawān thant ke' thaa'-thengkathayn nintang yimanangana, than wantayna, a' nintiya ke'-ngoongkam wik min anman thaw-thawāna, a' pam wanchant ngangk minangam iyy-iiyān thant; a' nint God.an ngaantam-ngeey-ngeeyān

nunang, woyan min nungantaman wak-wakāna, a' putha nintan minam anman iyy-iiyāna, pam koy'a, nint yipam woyan min God.antaman meen-meenathān thantana. ¹³ Nintaniy-a, ngaa' thon-thonangan lat ngench thayan anpalana wich-wichān thant, wik God.antaman waa'-waa'ān thant, pam wanch Christians al-alantan. A' ngay ngul-ngulana wampāng nungk. ¹⁴ Ka'athaman-a, pam wiy al-alangan waa'in nungkara, nil Ngeen-Wiy Min God.antam alangan ngul min-minam ma'-aath-aathow nintang, puth work inan yipam iyy-iiyān nungantana. Than wuut manth-thayan al-alangan-a, ma' wunpin kuchek nungkaramangana, a' mee'-wuthanamin nungkar — aak an-aniyangan nil Ngeen-Wiy Min God.antam alangan ngangk thay-thayanathan nintang work inan iyy-iiyānana. Timothy, inana ke' kon-ngathow nintangweya, konangam pi'-pi'āna God.angan ma'-aath-aath nintangan, nint work min yipam iyy-iiyān nungant. ¹⁵ Yaa, nint wik inangan ngangkangan pi'-pi'āna, a' minam anman iyy-iiyāna God.antan, ke' wantān nunanga, wiyangan yipam thathayn nintang, nintan min-minam paththaman iyy-iiyangan nungantana. ¹⁶ Nint murkanam anman minam anman iyy-iiyāna, wikan waa'-waa'ān, ke' wantāna, ya'a, puth nintiy thampa min-min wun-wunān, nint ke' yipam wayamān, puth nintan yipam ngul wun-wunān nungantang God.antangana aak umpuyama, nintam thonakam ya'a, puth pam wanch wiy thampana, wik nungkaraman ngeey-ngeeyantanweya.

5

Nint Minam Pi'-Pi'ān Thanang Christians Wiy Anangan, Wukalongk Wee'anangana

¹ Than Christians wiy al-alangan nath wayan yump-yumpiythan-a, nint itangam thaw-thawān thant wayana

kan wantayna, ke' nint kampan nungkaram al-alantan wik thaw-thawangan yimanangan. Pam manth-thayan al-alantan-a, kul ke' thaw-thawān thant, ya'a, nint wik itangam thaw-thawān thant wayan wantayna, ke' nint piip nungkaramant yimanangan itangam thaw-thawangan. Pam komp al-alantan-a, itangam thaw-thawān thant thampa, ke' nint kuunch nungkaramantan thaw-thawangan yimananga. ² Puth wanch manth-thayan al-alantan-a, nint wik itangam thaw-thawān thant ke' nint kaath nungkaramant yimanang itangam thaw-thawangana. Wanch kom-koman al-alantan-a, itangam thaw-thawān thant ke' nint wiil nungkaramant itangaman thaw-thawangan; puth nint minam anman iyy-iyyān thant, way thakan ke' ngaantam-ngeey-ngeeyān.

³ Puth nintiy-a, minam pi'-pi'ān thanang, wanch wukalongk anangana, than kampan ke'anangana. ⁴ Nilwey wukalongkan puk thampwey-a, nath kemiyanga, putha ngechiyang thampwey-a, yaa, than ep-paththam pi'ayn nunangweya, puth nil piip God.ana wik thayan yimanangan thawa. Than puth kaath piip ngamparamang ka'athaman pukaman pi'-pi'in ngampang, minam em-emathin ngampang puth ngamp puthangkana minam pi'-pi'āmp thanang, kampan ngamparaman. Inana min-minama mee' God.antangana. ⁵⁻⁸ Wik ngatharam inangana, waa'-waa'ān thant, pam wanch Christians al-alantan, than yipam wukalongk thanttamanwey pi'-pi'ayn thanang, than wiyangan ke' yipam wayan waa'-waa'ayn thanang. Puth nil wee'ang nathwey kampan nungantaman ke'an pi'-pi'iy thanang-a, kaath-kuncha puth kemwayyow-kuncha a' puth kampan wiy anangan thaka minam ke'an pi'-pi'iy-a, an ke' nil Christ.antan man-mangkam thee'-thee'an nungantana, an nil pam way-wayam paththam iyy-iyyan, nil ke' pam Christian ya'

yimanangan.

Wukalongk wiy anangana, kampan ke'anangwey, puth pokkapang wun-wuntanwey, puth than God.an kan-kanam ngangkangam pi'-pi'antan nunangana. Than ngaa' thon-thonan-a, mee'-wuth-wuthanamantan nungant, kinchang-a, puth ngutangana than thaw-thawantan nungant ma'-aath-aathow thanang. Than wukalongk anangaman-a, pam wanch Christians al-alangana pi'-pi'ayn thanangweya. Puth than wukalongk wiy al-alangana, thanttakam kaangk ngaantam-ngeey-ngeeyayn, woyan God.antaman ke'am wak-wakantana, Ngeen-Wiy Min God.antaman ngangkang ke' pi'-pi'antan, ya'a.

⁹ Ngay nungk inan tham thawang: wukalongk Christians al-alantan namp ump-umpān thant latangan, than yipam work iyy-iiyayn churchakan, puth Christians wiy al-alangan minam yipam pi'-pi'ayn thanang. Puth namp yotantan latangan ke' ump-umpān thanta. Wukalongk al-alantakam thonakam nampan ump-umpān: than wukalongk kaap sixty.angan wantan thanangan-a, puth maarich pam wiyantangan ke'aman kee'-kee'ina; ¹⁰ puth than minam anman iyy-iiyin pam wanch wiyantana puth puk thanttam anangan minaman em-emathin thanangweya; a' puth pam wanch Christians wiy anangan aak nathpalan wampin-a, minam pi'-pi'in thanang, may-a, ngak thakan aath-aathin thanang, a' puth ma'-aath-aathin thanang pam wanch ngangk wayan wun-wunina, a' puth wiy anangan ma'-aath-aathin thananga; niy puth wukalongk il-ilantan-a, namp ump-umpān thant latanganweya.

¹¹ Puth wukalongk kom-koman anangan-a, namp ke' umpān thant latangan, ya'a. Than nath ka'athamana Christ.an kaa'ngakiythan nunanga than nungant

thonakam workan iyy-iiyayn; puth ngul-ngulan-a, than nath kaangkwey puthaman pam ngentayn, ¹² a' wik ngul nath pipayna, wik thanan kaa'ngakin nunang Christ.antan thonakam work iyy-iiyayn, a' anpalana pam wanch wiyangan waa'-waa'ayn thananga. ¹³ Than putha, wukalongk kom-koman wiy anangan-a, ma'minam nath nyiin-nyiinayna, ke' nath work iyy-iiyayna, ya'a, than nath yuup anman iyy-iiyayn, aawuch thon-thonangan wamp-wampayna. Inan thampa, thanan wik nath kal-kalayn pal-puya, kaa' ngoonch-ngoonchayn aawuch thon-thonantangana, a' than nath wik wayanang thak aak-ya'ang waa'-waa'ayna. ¹⁴ Ngay inan ke'-paal kaangk than wukalongk kom-koman al-alangana pam kan ngent-ngentayn, puk yipam uw-uwayn, puth aawuch way min thakan minam pi'-pi'ayn, than yipam pam wanch wiyangana piip God.an kaangk ke'an nunanga, ke' yipam ngampang Christians.an way waa'-waa'ayn ngampangan ngula. ¹⁵ Puth wukalongk kom-koman wiy al-alangana, God.an kanam wantin nunang, oony wayan ngul monkan-wak-wakantan nunang.

¹⁶ Ngay inan putham ngul thawāng niyanta: nil wanch Christian wee'anwey kampan nungantamwey wukalongkan iyyow-a, yaa, nil pi'-pi'ow nunang. Than puth Christians wiy al-alangan churchangana ke' pi'-pi'iythan nunangweya, ya'a, wukal thakan ke' thee'-thee'iythan nungant, ya'a, than wukalongk wiy al-alantan ep thee'-thee'ayna, than kampan ke'anang al-alantan.

¹⁷ Pam wuut manth-thayan wiy al-alangan-a, minam ma'-aath-aathantan niyang Jesus.an monkan-wak-wakān nunang. Niiy minam ngaantam-ngeey-ngeeyān thanang thanan puth wik God.antaman waa'-waa'antan, thaa'-aath-aathantan thakan, a' niiy wukal yotwey thee'-thee'ān thanta. ¹⁸ Nil puth lat ngench thayanangan waa'-

waa'ana, wik inanganiy: “Nil minh bullockan work iyy-iyyiy niiyantana, may wheat thakan aakang maak-maakiy pe'anan yipam pent-pentayn-a, niiyaniy-a, thaa' nungantaman ke' kathān nunangweya, ya'a, nil yipam may wiy thampan mungk-mungkowa.” A' putha, lat ngench thayanangan waa'-waa'an thampa, “Nil wee'-nathweya workan iyy-iyyiy-a, an nil ep wukal uw-uwiya.”

¹⁹ Wiyiy-a, pam wanch wiyangan nath waa'-waa'iythan nunang pam wuut manth-thayan nil wayan yump-yump. Nil pam thonamangan nath waa'-waa'iy nungkan-a, nint ke' ngeeyān nunanga. Nath pam kuchamangwey-a, nath pam ko'alamangweya mee'miy nil wayan yump-yumpa, an waa'iythan nungka-a, anan ep nint wik ngeeyān thananga. ²⁰ Nil nath kan-kanam wayan yump-a, yaa, nintan wak-wakān nunang, wik thayanam thaw-thawān nunganta, mee' yotantangan churchangan nyiin-nyiantan, than yipam pam manth-thayan churchakan wiy anangan-a, nyaa' yipam iyy-iyayn, ke' yipam wayan yump-yumpayna.

²¹ Timothy-ang, wik ngayan ump-umpang nungkar-a, nil God.angan-a, puth Christ Jesus.angan-a, puth ngaantiyongk God.antam al-alangan-a, than puth thathathantant ngayang, puth nint wik ngeey-geeyān ngayanga! Nint puth aak-ya'angan ke' wak-wakān thanang, pam manth-thayan churchakana, puth than wee'-wee'anangan wayan yump-yumpiythan-a, nint ep wak-wakān thanang, wik ke' thenchān pam manth-thayan wiy al-alantaman, ya'a. ²²⁻²⁵ A' putha nint ke' kerkāna, paman erkam ke' mi'ān nunang pam manth-thayanan iyyow churchakan. Puth nil pam anman nath way iyy-iyiywey-a, an nilwey kenchathiy nintang, nint puth mi'an nunanga, pam manth-thayanan iyy-iyowa. Puth nintan way ke' iyy-iyāna! Pam wanch

wiyangan-a, way yump-yumpantan, a' yotan mee'miy ngul iyy-iiyantān thanttamana, thananiy putha courtak ngul iyyantan; puth pam wanch wiyangan-a, wayan mee' thenchanam yump-yumpantan, pam wanch wiyangana ke'am thiichantan — aak ngul-ngulana an ep wikan kan pentan ngul thanttamana. Inan thamp yimanangan wunwunan: pam wanch wiyangan-a, min yump-yumpantan mee' engkanangweya, a' yotan mee'miy ngul iyy-iiyantān thanttam; puth pam wanch wiyiy-a, ngamp ke' thiich-thiichimpa than minan yump-yumpantan — aak ngul-ngulana-a, an ep thiichanamp ngula than minan yumpantan. Nintan puth pam erkam ke' mi'ān nunang pam manth-thayanān iyy-iiyow, ya'a, nint kan kuupān thath-thathān nunang, a' ngaantam-ngeeyān ngul nil pam min nath iyy-iiyan, nath ya'a.

(Timothy.weya, nathpalman nint ngak thonakam mungkana, puth in-ngulana nint may wine many pattakam ngul mungkānweya, puth nintang ma'-yotam thipan weech-weechan, in puth opar min nungka.)

6

¹ Niiy Christians puungk wiyiy-a, slaves iyy-iiyaniy, niiy pam ma' wiyantang ngul work iyy-iiyaniy, than puth wukalang piyyin niiyang ke' yaraman anangan piyyantan wukalangan, niiy yipam yaam anman work iyy-iiyān thant. Niiyweya-a, moom niiyantam anangan-a, ngangk kulangam ke' kal-kalān thanang, puth minam iyy-iiyān thanttang. Puth niiywey nath way iyy-iiyin thantan-a, than pam wanch wiyangan God.an nath way waa'-waa'ayn nunang, puth wik min nungantam anangan way waa'-waa'ayn thamp ngampan thaa'-aathathanampweya. ² Moom niiyantaman nathwey Christian ngul iyy-iiyiywey-a, yaa, niiyana work minam iyy-iiyān

nungant, puth niiyana ke' ngaantam-ngeey-ngeeyāna ke' niiy work manyam anman iyy-iiyāna, an ya'a, puth nilana ke' kuunch niiyantam ngula. Puth niiyana work puy-puyam minam anman iyy-iiyān nungant moom niiyantamakan nil puth Christ.an monkan-wak-wakan nunang ngul, a' nil puth God.an kaangk wunan nungant. Niiy puth work min nath iyy-iiyin nungantanwey-a, yaa, an ke' niiyana kuunch niiyantaman ma'-aath-aathaniy nunangana — inan min a!

Than Wee'-Wee'anangan Kaangk Ma'mangkiy Anman Iyy-Iiyayn-a, Nil Oony Way Angan Thaach-Thaachan Thanang Way Yumpanak Thakana

Timothy-ang, nint wik inangan waa'-waa'ān thant, pam wanch nal-nalantan, a' thawān thant wik ngeey-ngeeyayna! ³ Puth pam puungk wiyangan-a, kaangk ke' ngeey-ngeeyayn, man-ngeeyantan wik min anangan nil Jesus Christ.angan waa'-waa' thanta, a' putha kaangk ke' ngeey-ngeeyayn wik min God.antam anangan, lat ngench thayanangan waa'an ngampar ngamp want-wanttakan minam iyy-iiyāmp mee' God.antangan. Puth anpalaan-a, than wik kan-kanam nungantaman ke'am waa'-waa'antan, ya'a, than puth wik thonang ngul thaa'-aath-aathantan thananga! ⁴ Puth pam nanangan-a, ulp-ulpanang iyy-iiyantana, than ngaantam-ngeey-ngeeyantan thanttakam ke' pam pi'an yimanangan, puth than ke' mee'miy wik God.antamana, ya'a. Thanan putha kaangk wik wayamana mep-mepwayn thanttakam, thaa'-thay-thayanamayn thakan. Anpalmaniy-a, thaniya mee'-wun-wuntan wiyantan, puth than ma'-yotam kul thaw-thawantan, kul-weenth iyy-iiyantant; than way waa'-waa'antan thanang, pam wanch wiy anangan a' ma'-pith-pithantan thanang. ⁵ Than puth wik

kan-kanam God.antaman ke'-ngul min-minan ngaantam-ngeey-ngeeyantan, ya'a, puth kuchek thanttaman kan-ngul wayamantan. Than ngaantam-ngeey-ngeeyantan thanttakam ke' than wee'-wee'anangana Christians.an iyy-iiyaynan-a, than puth wukal tha'iy thamp wunwuntan, puth an ya'a!

⁶ Nil pam Christian.ang wukal anman ke'wey ngaantam-ngeey-ngeeyiyan-a, a' nil kan-kanaman woyan God.antaman wak-wakiywey-a, an nilan puth ngangk minangam ngul iyy-iiyowa. ⁷ Ngul ngamp puth way min thamp aak-ngeey-ngeeyamp kaath ngamparamantaman ey? An ya'a, ngamp ma'lipam anman aak-ngeey-ngeeyampa. Puth ngamp uthamāmpan-a, ngamp puth ngeen ngul karpam kalimp aak inpalan aak kenyakana? An ya'-ya'am paththam a! ⁸ Ngamp nath may thakwey mungk-mungkimp-a, kulich thak pi'-pi'impan-a, ngamp ngangk minangam ngul iyy-iiyāmpa. ⁹ Puth pam wanch puungk wiyiya kaangk ma'mangkiy anman iyy-iiyayn, anpalana nil oony wayangan thaachthaachan thanang way yumpanak thakan, thanan yipam woyan nungantaman wak-wakayn. Thanan putha way yot-yotam ngul yump-yumpantan, yipam wukal uw-uwayn. Anpalan-a, than wayamantan ngul, way thakan ngaantam-ngeey-ngeeyantan, thaniya aak wayak ngul iyy-iiyayn, piip God.antangan aaka ke' wun-wunayn, ya'a. ¹⁰ Nil pamwey kaangk wukal-weenthan iyy-iiyow-a, an nilana woyan way ngul wak-wakana, a' puth anpalana nilan way-wayam paththam ngul iyy-iiyow. Than wiy al-alangana woyan God.antaman kan want-wantin, a' thanan ngangk way-wayam ngul yump-yumpwin thanttakam, puth than wukal tha'iy anman ngaantam-ngeey-ngeeyantan.

Nintiy-a, Ke'-Ngoongkam Minam Anman Iiy-Iiyāna

¹¹ Nintiy-a, pam God.antama, nint wayan ke' iiy-iiyina, nint ke'-ngoongkam minam anman iiy-iiyāna, a' ke' eenchān thampa, puth pam koy' anman iiy-iiyān mee' God.antangana. Nint God anman ngangkangam pi'-pi'ān nunang, a' puth ngangk minangam iiy-iiyān pam wanch wiyantan; a' putha, aak waywey wampow nungkarana, nint ke' wayamān, puth God anman monkan-wak-wakān nunang, a' puth thaa' itangam anman thaw-thawān thanta, ngangk minangam anman iiy-iiyān thant wiyantan. ¹² Ngamp Christians.an iiy-iiyanampan-a, an ke' ngamp kamp othamayan race.an mo'-mo'anamp yimanangan. Ngamp race.an mo'anampaniy-a, an ngamp kamp othamayan mo'-mo'anamp, itangam ya'a, chip-chipamana ke' than-thanāmp, ya'a, ke'am thak eenchanamp, puth anman murkanam mo'-mo'anamp yuk tape aakanakaman. Aak inana yimanangan wunana: ngamp ke' yippak aak God.antamangan in kenyan wunampa, ya' yippaka. Puth nint Timothy anman murkanam ngangkangan pi'-pi'ān nunang Christ.an, work minam anman iiy-iiyān nungant aak-aakanakaman nintan aak nungantamangana ngulan wunāna. Nil God.angan thaa'-palath nintanga nungantangan wunwunān aak umpuyamana; a' puth nint ka'athamana, pam wanch yotantang waa'-waa'an thant nint kan-kanaman ngangk thee'an nungant Jesus Christ.antan.

¹³ Wik ngayan thaw-thawang nungkar-a, nil God.angan ngeey-ngeeyan ngayang, nil God ilangaman way min ma'mangkam man-yethaman pi'-pi'an thanang. Puth nil thamp Jesus Christ.angan ngeey-ngeeyan ngayang. Nil Jesus ilangamana wik min anangan kan-kanaman thaw nungant Pontius Pilate alantana. ¹⁴ Nintiy putha, wik ngatharaman ngeey-ngeeyāna, ke' wayamān, puth kan-

kanam paththam wik ngeey-ngeeyāna, nil God.angan pam way ke' yipam waa'ow nintang. Wik ngatharaman ngeey-ngeeyāna aak-aakanakaman, nil Jesus Christ.an moom ngamparaman palaman ngulan wampow aak iikanakana. ¹⁵ Nil piip God.angana aak kanam mi' nungant Jesus.antan nil palaman wampowa, a' nil aak an-aniyangan ngul wampowa. Nil puth piip God.ana, pam min-minam paththama, nilam thonam anman moom pi'an paththam a! Niliy-a, moom pi'an iyy-iyan thanttam, pam pi'-pi'anam al-alantamana, a' kings al-alantaman aak nath-nathan wun-wuntan. ¹⁶ Nil anman thonam ke' uthamiy, ya'a, murkanam anman man-yetham wun-wunowa; aak nungantaman park-parkan anman, ngaa' ke'am wun-wunana, ya' anman, murkanam anman ganth pi'an paththam park-parkana, pam wanch puth ke' wampiythan thinthamana, an ya'a. Pam wanchang aak keenkanamana ke' thathanam nunang; puth in-inman ngamp ke' thathimp nunang, ya'a. Ngamp thaa'-kuump-kuumpāmp nunang, a' putha min waa'-waa'āmpan a! Niliya thay-thayanam anman wun-wunan, an kan-kanam paththam a!

¹⁷ Timothy-ang! Nint thawān thant pam wanch ma'-mangkiy al-alantan, ulp-ulpanangan ke' iyy-iyyayn, a' puth-a, wukal anangan ke' ngaantam-ngeey-ngeeyayn, an erkam ngul wayamayn aak ingan earthangana. Than puth ngaantam-ngeey-ngeeyayn nunang God.ana, puth nilama God.angan way min yot-yotam thee'-thee'an ngampar, ngamp yipam ngangk min iyy-iyyāmpa. ¹⁸ A' thawān thant thampa, ma'-yotam anman min iyy-iyyayn pam wanch wiyantan, a' thaa'pin iyy-iyyayn, way min thakan thee'-thee'ayn thant, wiy al-alantan. ¹⁹ Thanwey min yimanangan iyy-iyyiythan aak inganiy-a, thanan kangul thiichiythan than kan God.an ngangk min yump-

yumpantan nunang, thanan yipam kan-kanam paththam aak umpuyangam wun-wunayn nungantangana, ngangk minangam wun-wunayn.

²⁰ Timoth-ang, nint wik in ngeeya: nint wik God.antaman min-minam waa'-waa'ān thant, a' min-minam pi'-pi'ān thamp, puth nil God.angan work inan nungkar waa'a. Than wiyangan ke' wayathayn. Nint ke'a ngotan ngoonch-ngoonthān pam way al-alantangana wik way thakan thaa'-aath-aathantan thanang wiy anangan. Thanan puth thaw-thawantan ke' than wik God.antaman kan-kanam mee'miya, an puth ya'a, than yaan thaw-thawantana! ²¹ Puth pam puungk wiyangan-a, than God.an ke'-ngul ngangkangan pi'-pi'antan nunang, ya'a, than woyan min God.antamana too kan-ngul wantin.

Yaa, Timothy-ang, ngay kaangk nil piip God.an ngangk minangam iiy-iiyow nungkar.

Anman kan,
Paul.

Wik Inangan Kan-Kanam God.antama
The New Testament in the Wik-Mungkan language of Cape York,
Australia

copyright © 1984 Wycliffe Bible Translators

Language: Wik-Mungkan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 14 Jun 2022 from source files dated 28 May 2022

034de520-6788-5805-9b17-b658084b38e2